



Trair si bain il tagliom cun la cut è il pli impurtant. Uschiglio na tagli betg.




La struba (sanester) ch'ins dovra per fermar il plat numn'ins la «vera».

La fautsch enta puntg ed il cuzer sin tapun

Campjunadis da segar – ina participanta

DA CLAUDIA CADRUVI / ANR

■ Tge! Ina donna che sega? Datti quai? Cler. Per Martha Blöchliger-Gisler n'è quai nagut spezial. Ella prenda perfin part a campjunadis da segar. Ina giada ha ella purtà a chasa in cran.



La pura na fa nagins hantieris. Per ella è segar cun la fautsch il pli normal dal mund. Sin la dumonda, sche quai na saja betg memia hefti per ina donna, scurlatta ella il chau. E «muskelkater» u ina sturschida en il dies pervi dal segar? Da quai n'enconuscha ella betg. «Mai gi.»

E cu èsi il meglier per ir a segar, forsa la damaun? In pur u ina pura stoppia adina savair segar, ins na possia gea betg spetgar fin che l'aura saja ideala, declera Blöchliger. «Il meglier èsi dentant, sch'igl è in zitg bletsch, ma betg memia bletsch.»

Segà gia da mattatscha

Ella è naschida ils 25 da favrer 1965 ed è creschida si cun 14 fragliuns en ina famiglia da purs a Spiringen, ina pitschna vischnanca sin 1600 m.s.m. en il chantun Uri. «Nus avevan per part tessaglia spundas ch'ins stueva segar a maun.» Sch'il bab gieva a segar fascheva el adina vegnir in dals uffants. Era las mattatschas stuevan crair vidlonder. «Uschia han tuts emprendi da segar pli u main bain.»

Cura ch'il frar è a sa participà als emprims campjunadis da segar, abitava Martha anc a chasa. Era il bab era activ e s'engaschava sco arbiter a quests campjunadis. Ma da quel temp na s'interessava ella anc betg per tals cumbats.

Accumpagnà la sora

Il 1988 ha ella maridà Josef Blöchliger, pur sin il pass dal Ricken (SG). Ils onns ch'ils emprims quatter uffants èn naschids, aveva ella da far detgavunda cun il presser e la famiglia. Ma avant circa

diesch onns ha la pura ina giada accumpagnà sia sora ad in campjunadi da segar. Ella è ida senza l'intenziun da sa participar. Ma cura ch'ella è stada sin il plaz è Martha Blöchliger s'enscritta. Pertge betg? La finala ha ella gea era sin il Ricken mintga stad gidà a segar suenter cun la fautsch.

Ils ultims onns ha Blöchliger anc ina giada survegnì dus uffants. Tuttina è ella sa participada savens als campjunadis. Ella haja adina fatg il quart u tschintgavel plaz, rauinta ella cun in surrir: «Adina gist quel plaz ch'i na deva nagin cranzi pli!» Dal tut na constat quai dentant betg: Ina giada hai tuttina tanschi per in bel tschupi.

Trais campjunadis svizzers

I dat mintg'onn trais campjunadis impurtants en Svizra: il fanadur a Herisau (AR), l'avust a Frutigen (BE) ed il settember a Rothenthurm (SZ). L'onn passà è vegnì organisà in campjunadi internaziunal cun participaziuns da l'entir'Europa.

Per far in bun plaz dovri trenament, cundiziun e concentrasiun. Mintgin sega cun sia atgna fautsch. La lunghezza dal plat-fautsch n'è betg scritta avant. La fautsch da Blöchliger ha in plat dad 1,20 meters. La fautsch sto esser bain-battida, per gliez è Josef Blöchliger mintgamai responsabel. Ed ins sto trair si bain la fautsch, pertge ins sto pudair segar ses toc senza stuair star ari.

Las reglas da cumbat

Als campjunadis sa participeschan raround 200 personas: Tranter tschintg fin otgant'onnns datti tut. Ils umens cumbattan en trais categorias, las dunnas en duas. Per ils uffants datti las categorias da mats e mattas fin 15 onns. Ils pli pitschens obtegnan intgins puncts da sustegn.

Ils paders e las paderas decidan sezs quants meters ch'els vulan segar. Ils umens ston savens absolver in chanvè dubel. Era la ladezza dal chanvè inditgescha mintgin sez. Blöchliger sega chanvès da 2,30 meters. «Quai è mia ladezza.»

Ils arbiters mesiran il temp e quintan ora quant temp ch'ina padera u in parder han duvrà per meter quadrat. Ma tgi che vul gudagnar, dovra sper in bun temp era bler inschign. Las filtschadas ston esser gulivas. Il pastg sto esser taglià schuber. I sto vegnir segà exact suenter il fil stendi. I na dastgan vargar si nagins fains. Uschiglio vegn tratg giu puncts.

Nua èn ils Grischuns?

Il meglier plascha a Blöchliger il campjunadi a Rothenthurm. Là hai pradas da sternim che dastgan vegnir segadas pir il settember. «Quai è tut auter da segar», di ella.

Mintgatant sa participeschan era ils uffants da Blöchliger. Els han era gia purtà a chasa arbagias u auters bels premis.

Impurtant n'è dentant betg mo da far in bun plaz, mabain da pudair star patgific cun auters paders e paderas che vegnan da tuttas regiuns e magari schizunt da la Bavaria e da l'Austria.

Sulet ils purs e las puras dal Grischun na fan para mai stretg. Blöchliger rauinta ch'ella na haja anc mai inscuntrà Grischuns als campjunadis. «Atganamain donn», manegia ella. Ma tgi sa, forsa survegna ella tuttina anc in di concorrenza dal Grischun?

Ils proxims campjunadis

Ils 13 d'avust ed ils 20 d'avust han lieu ad Aarwangen ed a Frutigen campjunadis da segar rasdiv.

Ils 10 da settember cumenza a las 9.30 il campjunadi da segar starnim a Rothenthurm. Per quel campjunadi pon ins s'annunziar tar Albin Schuler, 041 838 14 73. Singuls participants pon era s'annunziar pir sin il plaz per la concorrenza.

Sin il bain dals Blöchlingers na datti da preschent nagut da segar. Per demonstrar co'i va, fa la pura tuttina intginas faltschidas.

Batter la fautsch è la lavur da Josef Blöchliger. L'emprim dovra el la maschina da batter. Ma las finessas fa el a maun cun marcladira e martè.



Nagins cumplitgims: Il cuzer penda vi dal satg-tapun.



La maschina da batter.

